

PLÊF DI S. MARTIN VESCU  
RUALP E VAL  
33022 CJARGNE

A PRE BEPO FANTON  
Plevan di Cjavaç par 22 agns

Siôr Santul,

o crodevi che un o chelâltri a varessin metût alc sul gjornâl catolic par ricuardâ il vueit che tu as lassât tun païs e tune int. Ma si viôt che, cjamâts di cefâ come che a son, si son dismenteâts di te, come che ti vevin smenteât di vîf.

Se no sbalgji, si son impensâts di te dome un viaç, cunche la int di Dimplan ti volevin lôr plevan in muart di biât pre Chechin e chei là jù no ti àn lassât. No tu eris avonde alt.

Ti àn esibît, sore, la cure di Bordan. No ere cuissà ce cucagne par un glemonàs come te, un dal scjap dai grancj predessons jessûts de plêf di Sante Marie e inomenâts ce par teolighe ce par penâl ce par studi. A tì ti àn dât la place di pre Jacum, un altri glemonàs ancje se riplantât di Cjaulis, chel che al diseve in predicje: "Dio ha detto ...; ha detto Dio", e, intant che al pensave ce che al veve dit Diu, al tirave sù mieze scjate di tabac di nâs. E la int di Bordan e capive instès ce che al veve dit Diu, parcè che Diu al fevele tal cûr dal om, ancje tal cûr di chêi di là da la aghe, di là di dut.

Ti ài cognossût propit in chêi fratimps alì. Tu passavis a straoris a Vençon e tu spesseavis a disbratâ l'Ufizi prime che a scjades la ore canoniche e no tu rivavis in timp, cun chês stradetis fodradis di cùgui, cun chêi biâts motorins, cun chê fan incrosade e chê strachetât dopo une zornade di corsis. Cuanche si è galupâts, come che o eri jo, si spicùle dut. O ti viodevi a lei di buride salmos e lezioms, cun chê serietât che al domandave il compit e cun chê sveltece che tocjave vê par jessi in regule cuntune regule che ti domandave cence dâti nuie, dome la strade osteda strânie e fûr di man che ti menave tal païs di San Simeon. O ài capît lî ch'and'è robis che si à di fâlis, ma cun tante libertât par dentri. E tû tu sês stât simpri un om libar, ancje cuant che tu âs avanzât dai gravârs di Bordan ai gravârs di Cjavaç.

Païs frêt, Cjavaç; païs difìcil. Par chel ti àn metût te. Nô, che no valìn, e àn di provânus propit tal païs plui intrigôs; i plui capaç ju mandin tai miôr puesej. Capistu un dret tu, di cheste pastorâl?

Ma se chêi làjù no ti àn capît, ti à capît la int. Le ai sintude te di dal to mortori. Par solit, sot vie a remenin il muart e si sbrochin cuant che nol pò plui muardi. O ben, se lu laudin, a disin che al ere oratôr, o che al ere svelt, o che al veve cognossincis, o che al saveve svolgisi tal splumâ bêçs e int, o che al à fat. Di te no ài sintût a fevelâ nè di teolighe nè di asilos o glesiis o canonichis. Tant plui che il taramot al à vualivât dut. Però e àn dit une robe che o paiarès no sai ce che me disessin a mi: "Al ere bon!". Ce vûstu vê di plui mo de int? Sastu che i Bordanês àn fate une corierone grande grande par vigniti a saludâ. Dopo 22 agns!

Tal ultin, tu ti eris butât cui fogolarins, salacôr par corompi un sclip la criure di Cjavaç. Migo che al seti un mâl, ve', pal amôr di Diu. Dome che nè tu nè jo no sin taiâts par chês robis alî. Cualchidun al nas acuile. Nô a sin nassûts gjalinatis e nus conven restâ a passonâ e a sgarfâ tal savalon, cu la plebe. Ti ai dit cuanche tu às stât a cjatâmi a Tumieç, ch'ò eri lì lì. Tu mi pocavis a sfrutâ la "fortune" de disgracie. Ti ài dit: "Pre Bepo, ve' chi un jet vueit, se propit tu ûs spartî il ben cun me". E tu, galiot, tu mi às dit che tu vevis premure di lâ. "Cumò, pre Bepo, tu mi plâs, cul to naturâl luteran!" A son stadis lis ultimis peraulis che si vin ditis in chest mont.

Cumò tu sês là sù, tai prâts verts dal Cîl. Ti varan dât, tràì, une cuarte di vert dopo tante grave che tu as viodût di ca e di là dal Tiliment. No sai cemût che bol venti-sù; e àn dit ch'al gambie dut, ancje i guscj e i desideris.

O speri dome che no ti vedin metût tal côro, a cjantâ "Osana" di un continuo. Miei là che àn il zûc des cjartis, cun chê passionate mostre che tu vevis. Cîr mo di vê cussience, tu che tu sês bon di arcâj l'âs di brisculas ancje a san Pieri!

Tu as vude tante int a compagnâti. E un slac di predis. And'ere une schirie lungje lungje, di restâ. Un pôcs baldàcs, âtrits cjamâts di atrîts, âtrits che a sfladassavin tal "Miserere"; ducj dibot avilîts. E la int a cjalâju, cheste tribù che va al mancûl; e a contâju, come che si fâs cui nemâi simpri plui rârs. O speri che cualchedun di chei che a passonin jù par Udin, i vegni un pêl di rimuars di cussience a lassâ tante int e tantis glesiis sfurnidis di personâl. Si podarès ancje sperâ che chêi di Cjavaç a setin in grât di tignî vierte la puarte de lôr glesie dibessôi. Al sarès il plui biel laut par un pari che s'in va; chel di viodi che la famee e va indenant pulît instès. E il vescul al varès di dîlu chest, cuanch'al va a soterâ un predi. Ma lôr e àn âtrits carismis, diferentis des nestris, e salocôr no rivin fint alî.

Par vieri, i papis ju imbalsamavin e i vescui ju punturavin, par ch'a durassin ungrun ancje dopo muarts. Dome i biâts predis ju soteravin sot come che a erin, a fâ cjare. Poben, il Vanzeli al dîs che se il grignel di forment nol mûr e no si fraides, nol pò nassi un spî. Te ti àn metût a froli tal simiteri de to int, ancje se ti àn sgnacât dentri in chês cuninarîs che a usin cumò. Tu sês simpri stât un scriçut di predi, cence intrigâ nè dâ fastidi. Tu as dut dirit di diventâ spî, di restâ tal cûr de to int, di polsâ dopo tantis corsis e tancj lambics.

Mandi, pre Bepo. E dîsi a Chel là sù che chêi ca jù no basilin masse pe Cjargne. Lui al lave a cirî ancje une sole piore fûr di trop. Ca jù a van indenant cui numars. Ma no vuei lambicâti cun cantîns che par te a son finîts. Polse, cumò.

(27.02.1980)

pre Antoni di Rualp